

La Lettre Jèrriaise - San'mdi lé dgiêx-neuf dé juîn 2021.

Bouônjour bouonnes gens. Ch'est Jean L'Maistre tch'a l'pliaîsi dé vos présenter la lettre Jèrriaise aniet, San'mdi lé dgiêx-neuf dé Juîn deux mille vîngt-tch'ieune.

Aniet j'ai pensé qué j'dévthais entanmer acouo eune aut' fais lé sujet dé l'agritchultuthe.

Chein tchi m'a fait y penser dreinement ch'est d'aver apèrchu cèrtains clios d'patates à l'entou d'nous ichîn à Millais. Ch'tait triste dé les vaie, p't-être manque dé plyie ou même du pousse-tchu. J'peux faithe servi chutte expression-là pa'ce qu' oulle est dans l'dictionnaithe et l'explicâtion donnée est..... Ch'est dé l'engrais tchi fait pousser vite des récoltes, comme, par exempl'ye, des patates! Cèrtainement il' ont l'air d'aver lé haînu.. tch'est un aut' mèrveilleuse expression. Èrgardez, bouonnes gens, dans l'dictionnaithe...ch'est mèrveilleux de pouver dècouvri, dans des p'tites carres, ches expressions si riches! Ch'est vraîment dé l'or ou p't-être des p'tits diamants qué nou trouve dé temps en temps dans not' ancienne langue.

J'pense souvent comment qué tout l'travas sus les fèrmes a changi dans ma connaissance dépis la dgèrre. Presqué tout 'tait fait à la main sinon pour les grandes tâches tchi 'taient réservées au j'va ou tchique fais aux j'vaux.

Pouor touônner la terre ch'tait au j'va et pis la hèrchéthie, griffonâge and l'houettage pouor les patates êlaitées avec le j'va. Mais y'avait tchiques exceptions quand nou griffonnait et houettait un rang à la fais ch'tait tchiquefais à la main et bouonnes gens, ch'tait du travas hardi dû.

Quand nou v'nait à foui les patates ch'tait à la main avec la frouque. Nous avait tchitch'un à êtèrrer et pis lé traîsième à gliainer les patates dans un pangni. I' fallait les verser douochement dans un p'tit bathi,

toutes prêtes pour les vendre aux marchands en Ville et pis les exporter par baté vers lé marchi en Angliétère.

Au jour d'aniet presqué tout chu travas se fait à la machinne, sauf p't-être la pliant'tie. I' c'mencent à utiliser les machinne à plianter avec dé bouôns résultats, qué j'ai oui!

Mais j'ai grand pitchi quand j'vai les travailleurs tchi sont à pilvâtchi parmi les patates quand i' sont à remplyi les grandes boêtes sus lus tchéthettes. Éventuellement tchitch'un s'en vont acater ches patates là pour les mangi! J'mé d'mande. s'en vont-t-i' èrtouônner eune deuxième ou traîsième fais pour acater nos belles Rouoyales ou s'en vont-t-i' acater des Angliaîches, tch'ont l'air d'être fraîches, à la pièche? Seux cèrtain, ch'est la chein qu'il appellent "lé progrès" mais pour dé mé, nou risque dé tuer not' marchi. Nou vèrra sans doute et j'espéthe qué j'sis pas correct.

J'comprends hardi bein qué tout est chi au jour d'aniet mais j'n'ai janmais veu autant d'côtis abandonnés à l'Êta comme ch't 'année ! Et en pus i' y' a plusieurs clios à l'Êta tchi n'ont pas 'té tchultivés. P't-être qué ch'tait à cause de la plyie au c'menchement d' l'année, tchi vînt à pliein dans la pliant'tie. Quand ch'la s'arrive ch'est împossibl'ye de faithe grand-chose et j'ai r'gret pour les fermièrs tchi s'trouvent dans ches conditions-là. Mais i' faut tréjous vivre en espéthance qué l'affaithe es'sa mus l'année tchi veint. J'lus souhaite bouonne chance pour le reste dé la saîson et pour l'année tchi veint.

Eh bein bouonnes gens, n'en v'là assez pour chute semaine.

Mèrcie pour m'aver écouté à matîn.

Gardez sauf, et à la préchaine!